

四庫全書

集部

欽定四庫全書

集部

江文通集卷三

詳校官監察御史_臣曹錫寶

檢討_臣何思鈞覆勘

總校官庶吉士_臣何思鈞

校對官中書_臣吳裕德

謄錄貢生_臣李廷對

欽定四庫全書

江文通集卷三

梁 江淹 撰

奏記

奏記南徐州新安王

伏惟明公殿下
列譽椒壁蜚聲
沖漢爰求儒雅
傍招異人
削赤野之玉翦
燕山之金至如
淹者東國之徒
步耳方歛影逃
形匡坐編蓬之
下遂遭烟露餘
彩日月末光

惟思知泰變色薰心淹聞齊石既撫無待巴人之唱柏
臺已構寧俟不才之木淹幼之鄉曲之譽長匱芹藻之
德豈宜炫璞鄭氏獻鳳楚門哉願避職吏緩其召書

牋

到主簿日詣建平王牋

淹乃庸人素非竒士既慚鄒魯儒生之德又謝燕趙俠
客之節徒以結髮衛次暫聞仁義常欲永辭冠劍弋釣
畎壑而身輕息重猥奉末光枉白璧之惠降黑貂之私

因茲感激未能自反負金羈於淮吳徙後車一作軍於河

楚竟不能曜丹雘騰英聲絕白雲負蒼梧至可知矣不
謂咸池再暉瑤光重照開高天之慈布厚地之施承命
以驚巡走且失淹聞古人為報常有意焉至乃一說之
効齊王動色一劔之感趙王解衣孤心迴槩有殞自天
被黜為吳興今辭建平王牋

淹本遷徙之徒非有儒墨之能亦以轉命溝間待殞巖
下誤得步脩梲循高軒伏層檻坐曲池承翠河之潤降

璇日之光載筆奉后盛飾立朝於山東百姓亦已殊甚
雖薦螻蟻拭黃塵不足以塞惠而小人狼狽為鬼為蜮
山淵所容衣劍不貸黥赭幽圜皆非報責仰遭大道之
行草木勿踐輟鑊斂火吹魂拾骨濯以江一作河漢之流

曝以秋陽之景蔽然黔首豈不戴天竊思伏阜九載齒
錄八年以春以秋且思且顧竟不能抑黑質揚赤文抽
精膽報慈光而自為擁腫之異木卒成踴躍之妖金所
謂孽由己作匪降自天猶沐造化餘靈宥以遐邑方蒙

被霜露裹糧洲島缺鑿山楹為室永與鼃鼃為羣猶蹶
者不忘起盲者不忘視况罪溢朔方尚駐一等之刑咎
過朱崖猶緩再重之施金石無知何以識答昔河濟荆
吳必獲陪從京輔闕轂長奉帷席德音在耳話言如昨
淹乃梁昌自投東極晨鳥不蜚遷骨何日一辭城濠旦
夕就遠白雲在天山川間之眷然西顧涕下若屑

到功曹叅軍詣竟陵公子良牋

竊惟明使君鉞下道耀神源德鑄靈極誕涵天聽資河

炤聖譽拂絃外芳激震中故衡梁孕秀璿璣流品變瑤
光之暉贊玉燭之色功邁翊殷績起匡漢是以赤瑕瓊
寶之文睇影而夔集青龍遺風之乘晞光而遠至如民
者益不足算所志不出繒販所學不遺祝筮業異儒墨
行乖曾史既乏修短之術又慚啟塞之辨不能伏軾躡
衡驚燕趙之郊黃金橫帶馳淄澠一作澠之幣語默罕緒
圓方靡樹謬以一氣之微邀百載之會躬奉英睿身蒙
青履故以潤厚累璧恩重兼金不悟懸黎降景靈河瀉

潤復獲執羈蘭陳迎笏桂序漏越之琴竊莊文之價缺
齧之劔盜頃襄之名心羞秦媵志慮楚犢抱魂一作魄踊
躍憂集如熏鑪感何日銘報焉期

啟

為建平王慶改號啟

竊以皇衢永謐則玉厯惟禎國慶方夷則繩澤式茂故
五鳳協年甘露應號况今道潤衍溢頌祉載繁嘉生蠲
慶風雲瑞節既覲昭晨方鑄昌化延守一隅無以自屈

不勝荒情

為建平王讓鎮南徐州刺史啟

臣言臣誓惟殃釁頻寫曲折慊慊狂愚冀蒙哀弔而聖
旨懸嚴便賜斷表神乖意失音影何地吞聲茹號情膽
載絕臣荒昧神氣爰自幼稟分踰鼎貴秩高外州臣之
素能或所不任况在憂年必取黜辱特為開非常之恩
借權製之義紊禮滅經實翦治本臣又能身祈命請一
感天地躑躅表啟心容已覩猶疑大道之行墨綵不興

孝治天下通喪獲遂陛下覆被仁明品物無漏豈於微
臣獨不蠲鑿焦鯁在躬輒復塵觸伏願暫輟聽覽少憐
苦草則臣死之日猶生之年臨啟恍惚魂識無主不勝
殞越怵息之心

為建平王謝賜石硯等啟

臣言奉勅賜石硯及法書五卷天旨又以臣書小進更
使勤習敬閱籀篆側觀硯功張衛慚竒金瓊羞麗臣夙
乏翰能素謝篇伎空賁恩輝徒隆慈飾方停烟墨永砥

學玩仰結聖造伏銘私荷不任下情

為建平王謝玉環刀等啟

奉勅賜玉環刀等五種珍器闕伏蒙猥降飾軼采朱

跨影懸魂

一作魂

崑岡歸琛闕山慚寶謹襲緹素以充握

睇垂光既深銘佩更積不任下情

為蕭領軍讓司空并敦勸啟

臣某言臣沿心之請丹識以傾詔旨冲挹便賜斷表伏
聞當遣王人猥垂獎勸仰天光休俯增驚厲中謝臣以為

槐鉉之任百王攸先具司是屬冠冕式瞻化曜昌輝連
基政務事深崇替迹豫興衰故道富一時則風行明令
才乏通權則山摧河泣既澆汨蒼祇將紊毀身國臣進
退惟疑再三自顧實以陋情悲忘寵極但畏軼超疲伍
迺叅鼎軸無德而貴豈敢偷存才怯任重物所不恕故
弱識褊槩頻布前辭枯木朽株永隔蠲恕豈特大車方
塵小雅有廢而已哉將據致寇之悔取鑒於茲矣且皇
華之命居上之鴻私鳳舉之招為下之殊榮國勲必書

史不謬牘况臣連牧圉岳董率職方既鑠近古垂耀中
葉揆望揣實為泰已甚而迺復降朱輪之使方枉青冊
之勸寤寐悵灼一作恂諒無以任輒重素誠冒覬神炤伏
願皇靈特垂開愍賜停正台之職并免敦勸之使餘所
榮忝誓不敢辭肅恭外屏祈迴恩授則於臣慊歎復為
惠造不任憂戴匪惶之情

為蕭太尉子姪拜領軍江州兗州豫州淮南黃

門謝啟

臣公言臣頻結崇寵亟延上爵休恩動俗烈榮振古鴻
品清飾已藹金圖秀鼎號銘共茂瑤篆永言戚慮鑒寐
殷心况乃秩洽朝門慶霑國珮弱息臣諱疑映晃等文
不昭典武不定功出內帷閫升降貂綬或振迹領侯職
贊禁錡或騰光江甸任鈞屏翼河充衝要既濫北門之
管淮豫險捍又謬西偏之寄兄子臣鸞忝守近畿嫡孫
臣某載華省闈皆倏忽曷景頻煩升荷雖咸罄愚識一作
職恪居匪替豈足以少塞神渥裁酬皇眷囂黷一盈慙

厲彌積談天之辨不能為臣陳辭雕龍之文無以為臣飾愧靜然肅念徘徊交集不任憂感沐浴之情

上書

獄中上建平王書

昔者賤臣叩心飛霜擊於燕地

一作市

庶女告天振風襲

於齊臺下官每讀其書未嘗不廢卷流涕何者士有一

定之論女有不易之行信而見疑貞而為戮是以壯夫

義士伏死而不顧者此

一作以此二字

也下官聞仁不可

恃善不可依謂徒虛語乃今知之伏願大王暫停左右

少

一作小

加憐

一作矜

察下官本蓬戶桑樞之人

一作民

布衣

韋帶之士退不飾詩書以驚愚進不買名聲

一作賣聲名

於

天下日者謬得升降承明之闕出入金華之殿何嘗不

局影凝嚴側身局禁者乎竊慕大王之義復為門下之

賓備鳴盜淺術之餘豫三五賤伎之末大王惠以恩光

顧以顏色實佩荆卿黃金之賜竊感豫讓國士之分矣

一無矣字常欲結纓伏劔少謝萬一剖心摩踵以報所天不

圖小人固陋坐貽謗缺迹墜昭憲身限幽圜履影弔心

酸鼻痛骨下官聞虧名為辱虧形次之每一念來
一作是以

每一念來一作忽若有遺加以涉旬月迫季秋天光沈
每一念來

陰左右無色身非木石與獄吏為伍此少卿所以仰天

槌心泣盡而繼之以血者一無也下官雖乏鄉曲之譽

然嘗聞士一無君子之行矣其上則隱於簾肆之間卧

於巖石之下次則結綬金馬之庭高議雲臺之上次一作

退則虜南越之君係單于之頸俱啟丹冊並圖青史寧

當爭分寸之末競錐刀之利哉下官聞積毀銷金積讒
糜骨遠則直生取疑於盜金近則伯魚被名於不義彼
之二子猶或如是況在下官焉能自免昔上將之恥絳
侯幽獄名臣之羞史遷下室至如下官當何言哉夫以
魯連之智辭祿而不返接輿之賢行歌而忘歸子陵閉
關於東越仲蔚杜門於西秦亦良可知也若使下官事
非其虛罪得其實亦當鉗口吞舌伏匕首以殞身何以
見齊魯奇節之人燕趙悲歌之士乎方今聖厯欽明天

下樂業青雲浮洛榮光塞河西洎臨洮狄道北距飛狐
陽原莫不浸仁沐義昭景飲醴而下官抱痛園門含憤
獄戶一物之微有足悲者仰惟大王少垂明白則梧丘
之魂不愧於沈首鵠亭之鬼無恨於灰骨不任肝膽之
切敬曰執事以聞此心既照死且不朽

末二句本西銘
定本他本缺

書

與交友論隱書

淹者海濱窟穴弋釣為伍自度非竒力異才不足聞見

於諸侯每承梁伯鸞卧於會稽之墅高伯達坐於華陰
之山心嘗慕之而未能及也嘗感子路之言不拜官而
仕無青組紫紱龜紐虎符之志但欲史歷巫卜為世俗
賤事耳而黦然十載竟不免衣食之敗何則性有所短
不可韋弦者有五一則體本疲緩卧不肯起二則人間
應修酷懶作書三則賓客相對口不能言四則性甚畏
動事絕不行五則愚婞妄發輒被口語有五短而無一
長豈可處人間耶知短而不可易者所謂輪椎分定也

猶如雞鶩之有毛不能得鸞鳳之光采矣况今年已三十白髮雜生長夜輾轉亂憂非一以溘至之命如星殞天促光半路不攀長意徒自欺取筋駑髓冷殊多災恙心頑質堅偏好冥默既信神農服食之言久固天竺道士之說守清淨煉神丹心甚愛之行善業度一世意甚美之今但願拾薇藿誦詩書樂天理性斂骨折步不踐過失之地耳猶以妻孥未奪桃李須陰望在五畝之宅半頃之田鳥赴簷上水匝階下則請從此隱長謝故人

若乃登峨嵎度流沙殮金石讀仙經嘗聞其驗非今日
之所言也誰謂難知青鳥明之貴布筆墨然亦馬足道
哉

報袁叔明書

僕知之矣高臯為別執手未期浮雲色曉悵然魂飛前
辱贈書知命僕息心越地採藥稽山友人幸甚去歲迫
名茂才冬盡不獲有報引領於邑情詎可及足下推僕
者不一二談也僕聞狂士之行有三竊嘗志之其竒

者則以紫天為宇環海為池保身大笑被髮行歌其次則堅坐崩岸僵卧深窟朝殮松屑夜誦仙經其下則辭榮城市退耕巖谷塞絕賓杜牆不出然者皆羞為西山之餓夫東國之黜臣而况其鄉黨乎或有社稷之士入而忘歸則爭論南宮之前衛主於邪伏身北闕之下納君於治至乃一說之奇驚畏左右一劔之功震慄鄰國夫能者惟橫議漢庭怒髮燕路且猶不數而况於鄰里乎若僕之行止已無可言矣材不肖文質無所直徒

以結髮游學備聞士大夫言曰在國忠處家孝取與庶
交友義故拂衣於梁齊之館抗手於楚趙之門且十年
矣容貌不能動人智謀不足自遠竟慚君子之恩卒離
饑寒之禍近親不言左右莫教涼秋陰陰獨立閑館輕
塵入戶飛鳥無迹命保琴書而守妻子其可得哉故國
史小官也而子長為之執戟下位也而子雲居之僕非
有輕車驃騎之畧交河雲險之功幸以盜竊文史之末
因循卜祝之間故俛首求衣斂眉寄食耳若十口之隸

去為

一作於

饑寒從疾舊里斥歸故鄉箕坐高視舉酒極

望雖五侯交書羣公走幣僕亦在南山之南矣此可為
智者道難與俗士言也方今仲秋風飛平原影色水鳥
立於孤洲蒼葭變於河曲寂然淵視憂心辭矣獨念賢
明蚤世英華殂落僕亦何人以堪久長一旦松柏被地
墳壘刺天何時復能銜杯酒者乎忽忽若狂願足下自
愛也

勅為朝賢答劉休範書

昔媯道鼎昌干羽未能戢姬德昭宣長旌猶卷舒焚衣
毀冕有自來矣皇宋靈武誕命聖道鬱宏三后連光四
聖沓軌或經天緯地構紫靈之符調風偃海隆黃旗之
祚莫不頌滿金石聲彰宇宙者也暨我太宗明皇帝惟
岳降聖重耀函夏延禮壁臺訪道衢室平陽之后卷迹
慚靈空同之君歛功謝德是以彩雲祥風之瑞布護區
中梯山棧火之俗欵徵請吏跨商軼夏洗周滌漢道澤
優衍猶不道封禪遐靈在天餘惠無泯主上文明金相

穆然玉色履璧之禎獲珪之應著在紀歲仁浸汙河惠
愛秋草想亦君之所聞也重以先帝靈畧潛通英轡遠
馭受話言必忠貞方肅之臣奉風聲必虔恭匪懈之士
明時琴瑟鼎鉉之盛且被於寧世而忽覲來書以惋以
慨君為齊梁楚越之主鼎貴一時金玉滿堂文馬千駟
爵授湯沐冠蓋於道惟名尊崇誰與為雄而出言效尤
吐音入戾舉旗類社志竊神禁稱兵歛衆遂窺外關今
朝無闕政頓構凌上之節室無壁豎坐生莫大之豐鴟

梟赭衣號興徒黨主萃淵藪寧滋之甚不臧不軌不忠
不義未有若斯者也宗枝之釁遠則吳楚見禽於一璧
盤石之嬖近則江荆面縛於小將此成敗蘭艾之鑿又
亦君之所知也聞彼虹飲鼠舞之異早見物徵河北隴
上之謠已露童詠所謂妖由人作孽不可逃然桓侯之
患良助寒心今羽林黃頭絡繹爭引熊渠飲飛首尾電
發伏波樓船掩江蔽汜渡遼甲卒充野布隰加以先天
蓋世之畧蕩海拔山之威任輔沛陳羽林鷁鷁露動龍

驥精騎風驅然後六師雲起九軍星連蜺旌外江虹艦
中水金甲映平陸鐵馬炤長原楚南嶽而永慨瞰九派
而懷恐伐罪弔民復驗於茲甫刑三千惟此為大僕才
等不羈志瀝丹欸故奏禍福行矣悵然袁褚劉蕭等疏
符

尚書符

起都官軍局符蘭臺

小注八字西銘定本缺

侍御史大夫尊冠賤履君臣斯位愛順惡逆成敗可曉
未有憑凌我江郊侵軼我河縣而不流魂漂骨丹宗血

祀者也沈攸之寂寥無文

一作聞

起自甲卒邀我百戰之

軍乘彼一捷之幸鑿山裂地紐紫要金擁旗藩伯便無

北面之禮受符方屏即有專征之釁箕賦深歛毒被南

郢枉墨矯繩

一作刑

害著西荆鬼怪其性故從始而遂終

狼戾其志乃沿少而得老山陵不奔移殃為慶踐祚無

賀按劍稱予遂乃闕馳逆書亭炤妖火此而可賒孰不

可宥今遣陳承叔彭文之等敢勁三萬前驅電躍呂安

國任侯伯垣崇祖曹虎頭等樓艦五萬射蛟中流苟元

賓郭文孝程隱雋等輕舸二萬高旗蔽日周盤龍張文

嘉諱道淵等鐵馬五千龍驤後陣凡此諸帥莫不氣薄

日月精變虹蜺或飲羽石梁或超踰門

一作亭

樓索鐵拔

距孤視萬旅顧眄則前後生風喑鳴則左右激電然

西銘

本然字下
闕一字

鑿戎薄臨驍虎百萬六軍徐軌五輅遲旆丹

艦發焰素甲生波樓煩白羽投鞍成岳漁陽黑騎浴鐵

為雲

一作犀

於是高山與深谷共湮紫芝與白艾同滅不

亦惜乎符至之日幸加三省其驅逼寢手之人鋒陣塢

壁之主若有投命軍門一無所問或能因罪立績賞不
示私斬祛射袂惟功是與購募之科具列如上信如白
水皦然無二臺明詳旨飛火普加宣下文書千里馳驛

論

無為論

并序

吾曾迴向正覺歸依福田友人勸吾仕吾志不改故著
無為論焉

有奕葉公子者聯蟬七代冠冕組望多素紈黼衣繡裳

負長劍而耿耿佩鳴玉而鏘鏘時遊稷下或客於梁間
英雄而豹變聽利害以龍驤乃動朱履而馳寶馬振玉
勒而曜金羈之無為先生之門問曰先生智德光融嵩
華無得以方其峻道義清遠溟海不足以喻其深無學
不窺無事不達容儀閑靜言笑溫雅至如釋迦三藏之
典李君道德之書宣尼六藝之文百氏兼該之術靡不
詳其津要而採摭沖玄煥乎若覩於鏡中炳乎若明於
掌內余聞天地之大德曰生何以聚人曰財是故老聃

以為柱史莊周以為園吏東方持戟而不倦尼父執鞭

而不恥寔萬世

古一作

之師範一時之高士先生嘉遁卷

迹養德不仕乃列子之所待非通天下之至理雖江海以
為榮實縉紳之所鄙先生倏爾笑而應之曰富之與貴
誰不欲哉乃運而不通也夫忠孝者國家之急務也申
生伍員不得志也懷道抱德玄風之所尚揚雄東方其
職未高也其大學者不過儒墨亦栖栖遑遑多有不遂
也子所引之士者情雖欲之志不行也憂喜不移其情

故可為道者也過此以往焉足言哉吾聞大人降迹廣
樹慈悲破生死之樊籠登涅槃之彼岸闡三乘以誘物
去一相以歸真有智者不見其去來有心者莫知其終
始使得湛然常住永絕殊塗無變無遷長祛百慮恬然
養神以安志為業欲使自天祐之吉無不利舒卷隨取
進退自然遁逸無悶幽居永貞亦何榮乎亦何鄙乎子
其得之吾何失之塵內方外於是乎著公子愜然而有
慚德遠巡而退

傳

袁友人傳

友人袁炳字叔明陳郡陽夏人其人天下之士幼有異才學無不覽文章倣儻清贍出一時任心觀書不為章句之學其篤行則信義惠和意罄如也常念蔭松柏詠詩書志氣跌宕不與俗人交俛眉暫仕歷國常侍員外郎府功曹臨湘令粟之入者悉散以贍親其為節也如此數百年未有此人焉至乃好妙賞文獨絕於世也又

撰晉史竒功未遂不幸卒官春秋二十有八與余有青雲之交非直銜杯酒而已嗟乎斯才也斯命也天之報施善人何如哉何如哉

自序傳

淹字文通濟陽考城人幼傳家業六歲能屬詩十三而孤邈過庭之訓長遂博覽羣書不事章句之學頗留精於文章所誦詠者蓋二十萬言而愛竒尚異深沈有遠識常慕司馬長卿梁伯鸞之徒然未能悉行也所與神

遊者惟陳留袁叔明而已弱冠以五經授宋始安王劉
子真略傳大義為南徐州新安王從事奉朝請始安之
薨也建平王劉景素聞風而悅待以布衣之禮然少年
嘗倜儻不俗或為世士所嫉遂誣淹以受金者將及抵
罪乃上書見意而免焉尋舉南徐州桂陽王秀才對策
上第轉巴陵王左常侍右軍建平王主簿賓待累年雅
以文章見遇而宋末多阻宗室有憂生之難王初欲羽
檄徵天下兵以求一旦之幸淹嘗從容曉諫言人事之

成敗每曰殿下不求宗廟之安如信左右之計則復見
麋鹿霜棲露宿於姑蘇之臺矣終不以納而更疑焉及
王移鎮朱方也又為鎮軍叅軍事領東海郡丞於是王
與不逞之徒日夜構議淹知禍機之將發又賦詩十五
首略明性命之理因以為諷王遂不悟乃憑怒而黜之
為建安吳興令地在東南嶠外閩越之舊境也爰有碧
水丹山珍木靈草皆淹平生所至愛不覺行路之遠矣
山中無事與道書為偶乃悠然獨往或日夕忘歸放浪

之際頗著文章自娛在邑三載朱方竟敗焉復還京師
值世道已昏守志閒居不交當軸之士俄皇帝始有大
功於四海聞而訪召之為尚書駕部郎驃騎竟陵公參
軍事當沈攸之起兵西楚也人懷危懼高帝嘗顧而問
之曰天下紛紛若是君謂如何淹對曰昔項強而劉弱
袁衆而曹寡羽號令諸侯竟受一劍之辱紹跨躡四州
終為奔北之虜此所謂在德不在鼎公何疑焉帝曰聞
此言者多矣其試為我言之淹曰公雄武有奇略一勝

也寬容而仁恕二勝也賢能畢力三勝也民望所歸四勝也奉天子而伐逆叛五勝也攸之志銳而器小一敗也有威而無恩二敗也士卒解體三敗也搢紳不懷四敗也懸兵數千里而無同惡相濟五敗也故豺狼十萬而終為我獲焉帝笑曰君談過矣是時軍書表記皆為草具逮東霸城府猶掌筆翰相府始置仍為記室參軍事及讓齊王九錫備物凡諸文表皆淹為之受禪之後又為驃騎豫章王記室參軍鎮東武令參掌詔冊並典

國史既非雅好辭不獲命尋遷正員散騎侍郎中書侍郎淹嘗云人生當適性為樂安能精意苦力求身後之名哉故自少及長未嘗著書惟集十卷謂如此足矣重以學不為人交不苟合又深信天竺緣果之文偏好老氏清淨之術仕所望不過諸卿二千石有耕織伏臘之資則隱矣常願幽居築宇絕棄人事苑以丹林池以綠水左倚郊甸右帶瀛澤青春爰謝則接武平臯素秋澄景則獨酌虛室侍姬三四趙女數人不則逍遙經紀彈

琴詠詩朝露幾閒忽忘老之將至淹之所學盡此而已
矣

墓銘

宋尚書左丞孫緬墓銘

光靈維周肇祀伊衛炤分上代鏡華中世睿誕降明秀
芳嗣烈學惟物範行實士節容與書林優遊史藝素巾
俄冠朱紱累轍來訪詩逸入詢禮缺麗名文質齊影儒
詰慶履匪舒沴氣遽結殯帷兮既晦泉火兮已閉曖遺

波於遙緒颯流馨於遠歲

宋安成王右常侍劉喬墓銘

丹陽韞聖豐鄉降賢玉葉既積金徽方傳乃毓伊人克
廣克宣騰芬中屬飛藻上年杳杳虛素永永沖闕雲意
霜拍瓊立水堅家寶以瑩國才未甄參錯報善茫昧雲
玄歛魂幽石委氣空山膚若流波身如絕煙芳菲一逝
美懋徒鐫

宋光祿大夫孫曼墓銘

川祇効鏡岳祥獻明碧葉獨秀瑶源自清幼炳器譽夙
耀才名體兼遷雲學備儒史紫閣咸趨朱軒既履貴交
慕塵素遊企軌騰藻上京振彩下國如彼綠蘭秉芬四
塞欵人逕之不平歎天路之冥默貴夫君之為美播靈
均與正則

齊御史中丞孫洗墓銘

筠以霜藹

一作霜

蘭以風薰深哉若人實好斯文系緒承

胄激藹驚芬才基魏粲學參漢雲覽志上載洽鏡前聞

騰名冠俗揚采絕羣方
黜明世式贊睿君如何不淑天
道難分敢雕窆石永晰幽墳

齊司徒右長史檀超墓銘

惟金有銑惟玉有瑤君實淵哉行為世標高志洒落逸
氣寂寥奧學內溢深文外昭嘉采籍譽登國振朝亦既
有美筠傷蕙彫人邇運曠世促道遼永矣仁矣流芳無
澆

行狀

建平王太妃周氏行狀

竊聞侯服之譽非黃冠能敷玉食之門寧皂衣所述諒
畏褻虛美於君后被空名於鼎貴然有漢臣誅行晉史
書德者亦云實而已焉伏見國太妃稟靈惟岳集慶上
遠世擅淮汝族冠疇代故以載曜聲書式炳騰牒矣太
妃誕異離一作離明之正和函雲露之中氣凝采齡歲賁章
笄年若迺彤管女圖之學纂組綺縞之工升降處謙之
儀柔靜居順之節莫不中道若性不嚴而成故譽滿闈

闕聲聞軒殿以元嘉某年歸於故司徒宣簡王既而第
高恒倫秩踰外品青軒華轂用光國輝素壁丹墀實隆
家貴具惟娒娒靡不式瞻而居尊以簡訓卑以弘躬謹
蘭閨身撫椒第若衛娥之炯行樊羸之英操方之茂如
也大明二年宣簡王薨太妃藉悲用禮撫孤用慈柔懿
之德愈彰肅敬之間日被雖文伯之母言不踰闕莒相
之主行存乎勤無以過也大明某年拜建平王太妃是
時今王春秋方富德業未隆藉茲金響終能玉播故綺

襦出宰弱冠升朝者亦太妃劬勞之訓也謂天蓋高降
年不永以太豫元年二月三日薨於荊州之內寢凡厥
遠邇以哀以嘆今祖行有期泉窆無遠素旂望路綵旌
思歸所以垂宣徽容髣髴金石者謹詳牒行狀具以申
言

誄

齊太祖高皇帝誄

日月鬱華風雲黯色傷動紫微悲匝璇極嗚呼哀哉粵

夏四月辛卯將遷座於泰安陵龍鑿既整羽衛以陳深
酸舊物掩咽故臣嗣皇帝永訣丹掖叫號青墀攀神光
之一絕慟遠邇之何期弓劍有慕纂德寫辭僉曰若稽
古聖璿圖靈鏡星驅發祥電光啟命誕惟弱齡惠志聰
情如金如璧爰秀爰英於纁冠歲騰華流藝允文允武
克明克睿聿尚登學嚴道尊師宣敷五禮優游六詩上
炫舊滯旁鏡前疑才罄艷采筆盡麗辭在友斯悌于親
伊孝儉泰共色夷阻一貌遊情跼矩縱心蹈教鄉術式

慕州閭是效業優登仕先哲攸懋矧乃寥廓淵規遠構
官府天地舟輿宇宙龍靜鳳戢欽竒揜秀昔在帝劉王
室放命狡焉偽誕晦朔陵正鋒車北軼燿火南盛太祖
時乘爰茲發迹塞井滅勲夷竈龕敵賞鏤王圖功蕤帝
冊乃厲中葉天未斂難兵百袁曹禍十楚漢吳地前崩
越壤首亂街號燿盛火列金斷聚甲如陵獻俘為觀北
楚倔強曾未屈膝雲屯被野魚麗亘日廟勇既消國圖
方匱神冊天開雄畧世出凶劍鱗沈醜戈羽逸隻騎不

還跨輪無匹厥庸戾止離珮委他榮鬱閭闔寵重山河
皇彝有文朝采方藹頻煩金紐左右緹蓋毗戎肅禁叅
輦侍旆譽馥區中道夢岷外河濟國險淮泗邦塵要藩
重設匪賢則親亦既推轂擁土庇民聲稜絕俗威贍殊
隣宋主陵遐紫殿過密話言之詔貽在英粹寅亮大寶
敷綸妙秘世識機鑿物宗淵懿無竄匪鍊靡與不洎三
階既馴五精惟至彭蠡九江地盡襟製亦有劉範衣纓
是絕躍馬山岫泛舟河澨縞鎬星流紅旗電結鳩翼競

扇豺牙爭礪禍纏紫禁兵交丹衛瑤祀若於金扆如綴
朝野傾儀咸歸上德實賴至公馮家提國懷險實泰危
亡必克機筮朝旦功定曛黑妙物更配具章重則深居
撫外遙棲繇默高秩方臻元禮有序王曰念哉輝寵是
與職褒宮閣任卷文武飾華麗貂紫金疊組宏猷溢俗
曾芬冠古憬彼朱方亦惟宗秩陰圖食昴潛謀貫日征
輪未誓偏旗銜律原燎既寂世囂伊謐爰宗爰貴以望
以實雁縣告靜象郡無虞香鬱遠域清麗瓊都國填氓

負朝委事虛實翳昔相嶽曜神居功美既損道富去益
再紐契訓重匡禹迹方同范張濯情汾射散簪山郊解
珮松石頰霞拂朝蒼煙惜夕韻屬玄經恩流金液靈厭
霸德少帝告釁滅慈滅養抵仁抵信枉獄炎鑪淫刑霜
刃剗忠翦義樊稚斲櫬慄慄萬民曰怨曰震妖蜮將崩
災裂昊蒼况乃鼎國資滌資匡臨朝闡命遏昏立綱事
繇毗漢義締翼商既綏地職亦懋天工權興典緯俾作
司空黼黻琱戈祐宇升庸徒賜先袞爰永渥冲實曰驃

騎卷迹辭功寰寓睦政畿甸綸風沈氏滔天勃逆舊楚
氣蹂黃池志轅柏舉裂禮紊度毀經棄序黑騎黔山朱
旗頰渚短兵相接長鍛為羣顛如海岸蠱似蒸雲合乃
霧激離則霰分荆國既軼郢縣方焚袁劉二戾焱馳焯
發聯謀制外儲兵襲內釁激瓊殿勢崩金闕志乘玄覽
圖矯秘鉞鴻妖逝星高侵棄月惟時諸侯上脫下競圖
服清蕩實綴仁聖輝耀國靈導揚主命曾規近晰深暮
遠鏡左輪朱頰表裏斯定七德飾歌九功絳詠乃陟上

鉉寵文方輝誕錫有秩綵吹旌旗贊政瑤光翊教太微
實曰太傅爰登相國緝民以禮綜祇以德景福咸湊芳
猷允塞羽泳式造絃縣是則金湯無險軌書攸同迴迴
寵迹窈窈睿功寶珪黛壤俾王于東絢冊是敷懋物既
崇設業設簏丹懸碧鏞於穆顯相黎元時邕冰州炎徼
來獻其琛雁海龍闕亦柔好音梁鼃棧鼉越險浮深遠
戎皆覲上靈必臨山吐石青野降寶露瑞芝麗草珍柯
爛樹人崩俗締玄緯幽數睠此妙德跂我王度筮滯炎

旻既變至公姜蕤媯華文祖受終大宋有訓高撫萬邦
容豫慶雲遊衍南風正服寶位圓光玉繩御繡懷古負
黼夙興丘礙必靜淵漪咸澄勛辰有作黔牖其義矜卑
廣慈合賤兼愛綴機剗賊輕章削罰迹去繁芻情歸素
一軒靡龍刻楹無丹密越賤申椒楚輟靈橘陵寢起邑
池藻誰縣遙館罕御離房空薦惇教路宮淹神正殿斟
酌信義左右律禮瑩彼皇維煌茲國體胄業既樹壁流
方啟漢求金岫吳寶銅塹寧若睿德讓駟却劍實才為

貴唯功是念火職咸允雲官亦熙既臯乃益匪稷伊夔
無舛巡風寧埃辯詩玉燭調文玄英最節乘山呈瑞航
海歸闕不曠景冊靡空歲月受緯機衡兼甄詩一作書史

孫韓各辨莊墨異理昭政往藹洗鑠前軌逍遙星斗徙
倚涼雲春飈方舞秋鴻初分式謠式詠載績載文邈哉
我后淪泳賢聖馨品作號盡物歸政蒼黎汰歡玄靈刷
慶永戩嘉祉方寅景命締詳有文颺沛將掩理昧人詖
道懸世險夏略遺圖忌華徇儉文闡陳几翌明告漸蛻

僑鬪食日月朏精矧在乘輿宇折宙傾稜纏鸞掖悲赴
紫扃去璇臺之照襲珠殞之冥嗚呼哀哉惟宮低景輦
路巖光惻柏門之黯黯泣松帳之茫茫上宮擗而詔御
咽羣后慕而侍衛傷攢靈既儼遠日以筮鬱鬱既奠龍
酌方撤素月夜橫翠炯曉結擬虛金而下欵吟空蕭而
增絕嗚呼哀哉於是颯天駕而從綺輿澁神行而撫文
輦傍建春而南蹕徑宜陽而東踐尚益益而未散乍眇
默而不轉睇千乘之共啜盼萬騎之相泣悲魏后之戀

譙惻漢主之懷沛辭金陵之匪義降雲陽之杳靄風竒
響而駐軒烟異色而低旆怨街邑之綵驂弔原野之縞
蓋挽夫愴而征馬凝痛縈盈其如帶嗚呼哀哉複林油
雲重山減日御房清淒神路冥謐昭徒肅燾幽祇竦蹕
攀光灑慟臨泉澍泗瑯座長嚴雕宮永悶寂帳寂兮寂
已遠夜缸夜兮夜何邃嗚呼哀哉

祭文

蕭驃騎祭石頭戰亡文

咸告忠貞之魂曰義為行首雄寔士節嗟爾驍鷲稟才
蹈烈守玉不渝懷冰可折氣彰靡旗情皦亂轍高墉摧
堅巨醜挫銳深痛克矜冤靈及雪隆恩殊悼臨爾以欵
千秋同盡百齡一世魂而有知咸無遠邇嗚呼哀哉

祝文

蕭太傅東耕祝文

敬祝先穡曰攝提方春黍稷未華灼爍發雲昭耀開霞
地煦景曖山艷水波側聞農政實惟民天競秬獻歲務

畎上年有滄疏潤興雨導泉崇耕巡索均逸共勞命彼
倌人稅於青臯羽旗銜旌雄戟耀毫呈典緇耦獻禮翠
壇宜民宜稼克降祈年願靈之降解珮停鑿神之行兮
氣為輶神之坐兮煙為蓋使嘉穀與玄鬯永爭光而無
沫哉

頌

閩中草木頌十五首

有序

僕一命之微遭萬代之幸不能鑄心礪骨以報所事擢

翼驥首自致丹梯爰乃恭承嘉惠守職閩中且僕生人
之樂久已盡矣所愛兩株樹十莖草之間耳今所鑿處
前峻山以蔽日後幽晦以多阻饑援搜索石瀨芟芟庭
中有故池水常決雖無魚梁釣臺處處可坐而葉饒冬
榮花有夏色茲赤縣之東南乎何其竒異也結莖吐秀
數千餘類心所憐者十有五族焉各為一頌以寫勞魂

金荆

江南之山連障連天既抱紫霞亦漱絳煙金荆嘉樹涵

雲宅仙姝節詎及幽意誰傳

相思

竦枝碧澗卧根石林日月斷色霧雨恒陰綠秀八炤丹
實四臨公子不至山客徒尋

豫章

伊南有材匪桂匪椒下貫金壤上籠赤霄盤薄廣結捎
瑟曾喬七年乃識非曰終朝

栢欄

異木之生疑竹疑草攢叢石逕森篁山道煙岫相珍雲壑共寶不華不縵何避工巧

杉

桐梓舊麗松枯稱竒焉如茲品獨秀青崖羣木歛望雜草不窺長入煙氣永參鸞螭

檉

木貴冬榮檉實寒色停黛峯頂挿翠石側碧葉菴藹頽柯翕絕方陋筠櫛遠笑荆棘

楊梅

寶跨荔枝芳鞅木蘭懷蕊挺實涵黃糝丹鏡日繡壑炤
霞綺巒為我羽翼委君玉盤

山桃

惟園有實惟山有叢丹鷓鷯露紫紫繞風引霧如電映
烟成虹伊春之秀乃華之宗

山中石榴

美木艷樹誰望誰待縹葉翠萼紅華絳采炤列泉石芬

披山海竒麗不移

一作徙

霜雪空改

木蓮

迸采泉壑騰光淵
丘紉麗碧巘紅艷
桂洲山人結侶靈
俗共遊時至不採
為子淹留

石菖蒲

藥寶靈品爰乃輔
性却疴衛福蠲邪
養正縹色外妍金
光內映草經所珍
仙圖是詠

黃連

黃連上草丹砂之次禦孽辟妖長靈久視駭龍行天馴
鳳匝地鴻飛以儀順道則利

薯蕷

華不可炫葉非足憐微根儻餌棄劍為仙黃金共壽青
履爭年君謂無妄我驗衡山

杜若

山中杜若嘉爾翠質不奇不俗載華載實同銜夕露共
炯朝日夷陂無二沈冥如一

藿香

桂以過冽麝以太芬摧阻天壽夭折人文詎及藿香微
馥微薰攝靈百仞養氣青霏

讚

銅劍讚 有序 汪本缺

永明初始造舊宮鑿東北之地皆平岡迤隴尤多古冢
墓有人得銅劍長尺五寸余既借看歎其古異客有謂
余曰古時乃以銅為兵乎其可得而聞不余笑而應曰

此證據甚多殆不俟言卿既欲知輒具言之余按山海經曰昆吾之山其上多赤銅郭璞注曰此山出金如火以之切玉如割泥也周穆王時西戎獻之尸子所謂昆吾之劍也越絕書曰赤瑾之山破而出錫若邪之谿洄而出銅歐冶鑄以為純鈎之劍又汲冢中得一銅劍長三尺五及今所記干將者亦皆非鐵明古者以銅錫為兵器也周書稱穆王時征犬戎得昆吾之劍火浣布長尺有咫又有鍊銅赤刀割玉如泥焉又左傳僖公十八

年鄭伯始朝於楚楚賜之金既而悔之盟曰無以鑄兵故以鑄三鐘杜預注云楚金利故也古者以銅為兵故禹貢云荆揚貢金三品余以為古者語質而難解今者語文而易了獨詩云元龜象齒其實象牙也書云厥包橘柚乃黃柑也金品上則黃中則赤下則黑黑金是鐵赤金是銅黃金是金黃金可為寶赤金可為兵黑金可為器韓子稱昔智伯繇之伐趙襄子初晉陽襄子金將盡問於張孟談孟談對曰吾聞董安于治晉陽也公室

悉以銅為柱質君可發而用之於是發之有餘金矣謂此據蓋可知焉又昔夏后氏使九牧貢金鑄九鼎於荆山之下于昆吾氏之墟白若甘攬之地圖其山川竒怪以形于鼎使民知神姦不逢其害以定其祥鼎成三足而方不炊而自沸不舛而自藏不遷而自行九鼎既成定之國都桀有昏德鼎遷於商殷紂暴虐鼎遷於周每人主休明鼎雖小而重其姦回昏亂雖大而輕及周顯王三十二年姬德大衰乃淪入泗水秦始皇之初見於

彭城二十七年始皇東遊大發徒出之而不能得焉後漢武帝賓禮百神於汾陰得大鼎時人以為九鼎其詳不可得而審也且荆軻刺秦王之日匕首擊銅柱銅柱火出則古者非直以銅為匕首亦以為殿柱也且始皇之世長狄十二見於臨洮身長三丈足跡六尺於是始皇歛天下之兵鑄而象之故西京賦云高門有閎列坐金狄是也又造阿房之宮其門悉用磁石磁石喻鐵以防外兵之入焉以此推之明知春秋迄於戰國戰國至

於秦時攻爭紛亂兵革互興銅既不充給故以鐵足之
鑄銅既難求鐵甚易是故銅兵轉少鐵兵轉多年甚一
年歲甚一歲漸染流遷遂成風俗所以鐵工比肩而銅
工稍絕二漢之世逾見其微及漢建安二十四年魏文
帝為太子時鑄三寶刀二匕首天下百鍊之精利而悉
是鑄鐵不能復鑄銅矣按張華博物志亦稱鑄銅之工
不復可得惟蜀地羌中時有解者由此言之斯妙久絕
余謂不復能鑄銅者正當不能使利如霜雪光如雲霞

陸斬犀兕水斷蛟龍豈復不能鑄銅鑪錠燈耶然今太極殿前兩大銅鏡即周景王鑄也製作精巧獨絕晚世今之作必不及古猶今鏡不及古鏡今鐘不及古鐘矣昔余為吳興令鑿池又獲銅箭鏑數十枚時有人復於彼山中伐木得銅斧一口古銅鑄為兵豈為一據故備言其詳以發子之蒙矣古貴銅賤鐵非獨此事按皇覽帝王冢墓記稱吳王闔閭冢銅槨三重永池六尺玉鳧之流扁諸之劍三盤郢魚腸之劍在焉秦始皇冢亦以

銅擲水銀為江河關東賊發之至銅擲而取銅深大不可多得因此穴塞漢闕思王家時奢侈皆生葬取愛幸奴婢蓄穀為銅牕以通殉葬者氣息兼以水火守冢給呼召數十年乃不復聞聲矣晚世之葬無復此例然猶自大奢大富大盛或傾一國之財或竭一家之寶或爭為宏麗或競相高尚前漢奢於後漢魏時富於晉世中原既夷至於江左時天下凋喪制度日衰富貴之家猶或厚葬然論古論曩亦減損千萬倍矣世愈貧狹哀禮

愈薄又往古之事棺皆不用釘悉用細腰其細腰之法長七寸廣三寸厚二寸五分狀如木秤兩頭大而中央小仍鑿棺際而安之因普漆其外一棺凡用細腰五十枚大略如此亦可謂至巧矣其法既絕亦有銅釘銅釘之體皆如今柘釘形也銅釘既滑多被發掘自義熙以來乃以柘代銅爰及明器之屬亦多減省必不得已乃用烏牙焉相與皆用素棺不得施漆及自棺之外一無所設既由貧富之懸兼以避患之及耳故為此讚以

明古今銅鐵之兵刃莫送之事焉乃成讚曰

悠悠開闢或聖或賢蚩尤鑄銅為兵幾年天生五才實
此為先既古既曩誰測誰傳紛綸百代事無不異况迺
金鐵國之利器風胡專精歐冶妙思於昔則出於今則
秘聞之釋經萬物澹薄在古必厚在今必惡徒侈徒異
徒鏟徒削聊舉一槩以明鴻畧

雲山讚四首

有序

壁上有雜畫皆作山水好勢仙者五六雲氣生焉悵然

會意題為小讚云

王太子

子喬好輕舉不待鍊銀丹控鶴去窈窕學鳳對嶺岏山
無一春草谷有千年蘭雲衣不躑躅龍駕何時還

陰長生

陰君惜靈骨珪璧詎為寶日夜名山側果得金丹道憂
傷永不至光顏如碧草若渡西海時致意三青鳥

白雲

紫煙世不覲赤鱗
庖所捐白雲亦海外
益益起三山蕭瑟
玉池上容喬帝臺
前欲知青都裏乘此
乃登天

秦女

青琴既曠世綠珠亦絕羣
猶不及秦女十五乘綵雲
壁質人不見瓊光俗詎聞
願使洛靈往為我道音芬



江文通集卷三

欽定四庫全書

集部

江文通集卷四

詳校官監察御史

臣曹錫寶

檢討臣何思鈞覆勘

總校官庶吉士

臣何思鈞

校對官中書

臣吳裕德

謄錄監生

臣范墉

欽定四庫全書

江文通集卷四

梁江淹撰

騷

遂古篇

有序

僕嘗為造化篇以學古制今觸類而廣之復有此文兼象天問以遊思云爾

聞之遂古大火然兮水亦溟滓無涯邊兮女媧煉石補

蒼天兮共工所觸不周山兮河洛交戰寧深淵兮黃炎
共鬪涿鹿川兮女岐九子為氏先兮蚩尤鑄兵幾千年
兮十日並出堯之間兮羿迺斃日事豈然兮嫦娥奔月
誰所傳兮豐隆騎雲為靈仙兮夏開乘龍何因緣兮傳
說託星安得宣兮夸父鄧林義亦艱兮建木千里烏易
論兮穆王周流往復旋兮河宗王母可與言兮青鳥所
解路誠實兮五色玉石出西偏兮崑崙之墟海此間兮
去彼宗周萬二千兮山經古書亂編篇兮郭釋有兩未

精堅兮上有剛氣道家言兮日月五星皆虛懸兮倒景
去地出雲烟兮九地之下如有天兮土伯九約寧若先
兮西方蓐收司金門兮北極禹強為常存兮帝之二女
遊湘沅兮霄明燭光向焜煌兮太一司命鬼之元兮山
鬼國殤為遊魂兮迦維羅衛道最尊兮黃金之身誰能
原兮恒星不見頗可論兮其說彬炳多聖言兮六合之
內心常渾兮幽明詭性令智昏兮河圖洛書為信然兮
孔甲豢龍古共一作傳兮禹時防風處隅山兮春秋長

狄生何邊兮臨洮所見又何緣兮蓬萊之水淺於前兮
東海之波為桑田兮山崩邑淪寧幾千兮石生土長必
積年兮漢鑿昆明灰炭全兮魏開濟渠螺蚌堅兮白日
再中誰使然兮北斗不見藏何間兮建章鳳闕神光連
兮未央鐘簋生華鮮兮銅為兵器秦之前兮丈夫衣綵
六國先兮周時女子出世間兮班君絲履遊泰山兮人
鬼之際有隱淪兮四海之外孰方圓兮沃沮肅慎東北
邊兮長臂兩面赤乘船兮東南倭國皆文身兮其外黑

齒次裸民兮侏儒三尺並為鄰兮西北丁零又烏孫兮
車師月支種類繁兮馬蹄之國善騰奔兮西南烏弋及
罽賓兮天竺于闐皆胡人兮條支安息西海濶兮人跡
所極至大秦兮珊瑚明珠銅金銀兮琉璃瑪瑙來雜陳
兮碑礫水精莫非真兮雄黃雌石出山垠兮青白蓮華
被水濱兮宮殿樓觀並七珍兮窮陸溟海又有民兮長
股深目豈君臣兮丈夫女子及三身兮結胸反舌一臂
人兮跂踵交脛與羽民兮不死之國皆何因兮茫茫造

化理難循兮聖者不測况庸倫兮筆墨之暇為此文兮
薄暮雷電聊以忘憂又示君兮

雜詞 有序

予上國不才黜為閩山長吏待罪三載究識煙霞之狀
既對道書官又無職筆墨之勢聊為後文

構象臺

曰上妙兮道之精道之精兮俗為名名可宗兮聖風立
立聖風兮茲教生寫經記兮寄圖刹畫影象兮在丹青

起淨法兮出西海流梵音兮至東溟網紫宙兮洽萬品
冠璇寓兮濟羣生余汨阻兮至南國迹已徂兮心未扃
立孤臺兮山岫架半室兮江汀累青杉於澗構積紅石
於林櫺雲八重兮七色山十影兮九形金燈兮江籬環
軒兮匝池相思兮豫章戴雪兮抱霜栽異木而同秀種
雜草而一香苔蘚生兮繞石戶蓮華舒兮繡池梁伊日
月之寂寂無人音與馬迹耽禪情於雲逕守息心於端
石永結意於鷺山長憔悴而不惜

訪道經

百學兮異文錦派兮綺分珍君之言兮曠無際悦子之
道兮迴不羣澹深韻於白水儼高意於浮雲軌賢豪於
後學軼望識於前文茲道兮可傳可傳兮皓然挾茲心
兮赴絕國懷此書兮坐空山空山隱麟兮窮翠壑水散
漫兮涵素壑海外陰兮氣曇曇江上月兮光灼灼東南
出兮不一山西北來兮乃雙鶴池中蓮兮十色紅窗前
樹兮萬葉落四壁深兮乃沈瀟左右虛兮如寂寔寂寔

兮山室德經兮道衷盪魂兮刷氣掩憂兮靜疾信若人
兮先覺聊與子兮如一

鏡論語

巡青史之殘誥覽朱管之遺冊惟魯濱之一叟信銜道
而探寂世艱險而多阻君英明而不革講業兮齊衛論
精兮洙泗子之說兮義已祕成賈鄭之雄理考黃何之
壯思惜古人之取才瞰青雲而靖意意惆悵兮有端才嶮
峻兮可觀憲媯禹而析法襲仁誼而求安不嬾婉於戚

施寧蹠踔於馬蘭俾後生之庶士鑒明德之音翰惟山
中兮寂寞沈憂思兮無從石紅青兮百疊山濃淡兮萬
重日下兮關二字月出兮銅峰竹色兮拂戶水氣兮繞窗
味哲人之遺珍折片句兮忘老嘉石門之埋名憐柳子
之耽道書吳伯於衣袖鏤顏子於心抱籌出處之叔仲
酌言默之多少若妙行與上靈非積學之所紹至游夏
以升降幸砥心而勿天

悅曲池

北山兮黛柏南江兮蘋石蘋峯兮若虹黛樹兮如畫暮
雲兮十里朝霞兮千尺千尺兮緜緜青氣兮往旋桐之
葉兮蔽日桂之枝兮刺天百谷多兮瀉亂波雜礫饒兮
鶩叢泉竟長洲兮匝東島縈曲嶼兮繞西山山巒岿兮
水環合水環合兮石重沓林中電兮雨冥冥江上風兮
木颯颯盟清泠兮適潺湲白雲起兮弔石蓮客子思兮
心斷絕心斷絕兮愁無閑步東池兮夜未艾卧西窗兮
月向山引一息於魂內擾百緒於眼前意春蘭與秋若

願不絕於江邊

愛遠山

伯鸞兮已遠名山兮不返
逮紺草之可結及朱華之未
晚緜余馬於椒阿漾余舟於沙衍
臨星朏兮樹闇看日晚
爍兮霞淺淺霞兮駭雲一合兮一分
映壑兮為飾綴澗兮成文
碧色兮婉轉丹秀兮益益
深林寂以窈窈上猿狖之所羣
羣猿兮聒山大林兮蔽天
楓岫兮筠嶺蘭畹兮芝田
紫蒲兮光水紅荷兮艷泉
香枝兮嫩葉翡翠累兮

翠疊非郢路之遼遠實寸憂之相接歎美人於心底願
山與川之可涉若溘死於汀潭哀時命而自愜

應謝主簿騷體

山櫺靜兮悲凝涼澗軒掩兮酒涵霜層風激兮綠蘋斷
積石閉兮紫苔傷芝原寂少色筠庭黯無光沐予冠於
極浦馳予珮兮江陽弔秋冬之已暮憂與憂兮不忘使
杜蘅可翦而棄夫何貴於芬芳

劉僕射東山集學騷

含秋一顧眇然山中檀藥循石便娟來風木瑟瑟兮氣
蓋蓋石戔戔兮水成文摘江崖之素草窺海岫之青雲
願芙蓉兮未晦遵江波兮待君

山中楚辭五首

青春素景兮白日出之藹藹吾將弭節於江夏見杜若
之始大結瑇鱗以成車懸雜羽而為蓋草色綠而馬聲
悲款沿袖以流帶

予將禮於太一乃雄劒兮玉鈎日華粲於芳閣月金披

於翠樓舞燕趙之上色激河淇之名謳薦西海之異品
傾東岳之庶馘乘文魚兮錦質要靈人兮中洲

入橘浦兮容與心憒憒兮迷所識視煙霞如一色深秋
窈以虧天上列星之所極桂之生兮山之巒紛可愛兮
柯團團谿崎嶇兮石架阻颺颺兮木道寒煙色閉兮
喬木橈嵐氣閤兮幽篁難忌螻蛄之早吟惜王孫之晚
還信於邑兮白露方天病兮秋蘭

石筵筵兮蔽泉雪疊疊兮薄樹車蕭條兮山逼舟容與

兮水路愍晨夜之摧挫感春秋之欲暮征夫輟而在傍
御者跼而載顧

魂兮歸來異方不可以親蝮蛇九首雄虺戴鱗炎穴一
光骨爛魂傷玄狐曳尾赤象為梁至日歸來無往此異
方

樂府

齊籍田樂歌二首

永明四年籍田
詔江淹造歌

迎送神升歌

羽鑿從動金駕時遊教騰義鏡樂綴前修率先丹耜躬
遵綠疇靈之聖之歲殷澤柔

饗神歌

瓊竿既飾繡簋以陳方燮嘉種永毓宵民

牲出入歌

祝詳史具禮備樂薦有牲在陳有鼓在懸騰燭象星奔
水類電郊燎夙戒駢彼乘駟以伺質明以佇神晏

薦豆呈毛血歌辭

時恭時祀有物有則伊我上聖實抱明德犧象交陳鬱
尊四塞黍惟嘉穀酒惟玄默薦通蒼祇慶覃黎黑願靈
之降祚家祐國

奏宣列之樂歌舞

殷崇配天周尊明祀瑞合汾陰慶同泰時青幕雲舒丹
殿霞起二曜惟新五精告始于以享之景福是履

齊鳳凰銜書伎辭

宋世有此辭齊初
詔中書郎江淹改

皇齊啟運從瑤璣靈鳳銜書集紫微和樂既洽神所依

超商卷夏耀英輝永世壽昌聲華飛

銅爵妓

武皇去金閣英威長寂寞雄劔頓無光雜佩亦銷爍秋
至明月圓風傷白露落清夜何湛湛孤燭映蘭幕撫影
愴無從惟懷憂不薄瑤色行應罷紅芳幾為樂徒登歌
舞臺終成螻蟻郭

採菱曲

秋日心容與涉水望碧蓮紫菱亦可採試以緩愁年參

差萬葉下泛漾百流前高彩隘通壑香氣麗廣川歌出

擢

一作趙

女曲儻入江南絃梁龜非逐俗駕鯉乃懷仙衆

美信如此無恨

限一作

在

出一作

清泉

詩

侍始安王石頭

緒官承盛世逢恩侍英王結劔從深景撫袖逐曾光暮
情鬱無已流望在川陽平原忽超遠參差見南湘何如
塞北陰雲鴻盡來翔擘鏡照愁色徒坐隱憂方山中如

未夕無使桂葉傷

從征虜始安王道中

秉笏從帷幕，仄身豫休明。君子未獲宴，小人亦自營。結
軒首涼野，驅馬徼寒城。容裔還鄉權，逶迤去國旌。山氣
亘百里，山色與雲平。喬松日夜竦，紅霞旦夕生。徒慙恩

原一作厚

槩空抱春，施名仰願光。威遠歲晏返，柴荆

從冠軍建平王登廬山香爐峯

廣成愛神鼎，淮南好丹經。此山

一作峯

具鸞鶴往來，盡仙

靈瑤草正翕絕玉樹信葱青絳氣下縈薄白雲上杳冥
中坐瞰蜿虹俛伏視流星不尋遐怪極則知耳目驚日
落長沙渚曾陰萬里生藉蘭素多意臨風默含情方學
松柏隱羞逐市井名幸承光誦末伏思託後旌

選作
旌

從建平王遊紀南城

恭承此嘉惠

一作
德

末官至南荆斂衽依光彩

一作
采

端笏

奉仁明再逢綠草合重見翠雲生江甸知禮富漢渚聞
教清君王澹以思樹羽望楚城年積衣劔滅地遠宮館

平錦帳終寂寞綵色祕音英丹砂信難學黃金不可成
遷化每如茲安用貴空名流巖慘中懷凝意方自驚願
借若木景長照憂人情

望荆山

奉義

一作
謁

至江漢始知楚塞長南關

一作
閩

繞桐柏西嶽

一作
途

出魯陽寒郊無留影秋日懸清光悲風撓

一作
繞重

林雲霞肅川漲歲晏君如何零淚霑衣裳玉柱空掩露
金尊坐含霜一聞苦寒奏再使艷歌傷

步桐臺

客子畏霜雪憂至竟悠哉綺帷生網羅寶刀積塵埃思
君出漢北鞍馬登楚臺歲綵合雲光平原秋色來寂聽
積空意凝望信長懷蕙芬自有美光景詎徘徊山中忽
緩駕暮雲將盈階

秋至懷歸

悵然集漢北還望岨山田汙汙百重壑參差萬里山楚
關帶秦隴荆雲冠吳烟草色斂窮水木葉變吳川秋至

帝子降客人傷嬋娟試訪淮海使歸路成數千蓬驅未
止極旌心徒自懸若華想無慰憂至定傷年

渡西塞望江上諸山

南國多異山雜樹共冬榮潺湲夕澗急嘈囀晨鷗鳴石
林上參錯流沫下縱橫松氣鑑青藹霞光鑠丹英望古
一凝思留滯桂枝情結友愛遠岳採藥好長生常一作當
畏佳人晚秋蘭傷紫莖海外果可學歲暮誦仙經

赤亭渚

吳江泛丘墟饒桂復多楓水夕潮波黑日暮精氣紅路
長寒光盡鳥鳴秋草秋草一作草木窮瑤水雖未合珠霜竊過
中坐識物序晏卧視歲陰空一傷千里極獨望淮海風
遠心何所類雲邊有征鴻

渡泉嶠出諸山之頂

岑崟蔽日月左右信艱哉萬壑共馳騫百谷爭往來鷹
隼既厲翼蛟魚亦曝鰓崩壁迭枕卧斲石屢盤迴伏波
未能鑿樓船不敢開百年積流水千歲生青苔行行詎

半景余馬以長懷南方天炎火魂兮可歸來

僊陽亭

擘淚訪亭侯茲地乃閩城萬古通漢使千載連吳兵瑤
礪夏嶄萃銅山鬱縱橫方水埋金腹圓岸伏丹瓊下視
雄虹照俯看綠霞明桂枝空命折烟氣坐自驚劍逕羞
前檢岷山慙舊名伊我從霜露僕御復孤征楚客心命
絕一願聞越聲

遊黃蘗山

長望竟何極，閩雲連越邊。南州饒竒怪，赤縣多靈仙。金
峰各虧日，銅石共臨天。陽岫照鸞采，陰谿噴龍泉。殘杙
千代木，唐萃萬古烟。禽鳴丹壁上，猿嘯青崖間。秦皇慕
隱淪，漢武願長年。皆負雄豪威，棄劍為名山。况我葵藿
志，松木橫眼前。所若同遠好，臨風載悠然。

還故園

漢臣泣長沙，楚客悲辰陽。古今雖不舉，茲理亦宜傷。山
中，信寂寥。孤景吟空堂，北地三變露。南簷再逢霜，竊值

寰海關仄見圭緯昌浮雲抱山川遊子御故鄉遽發桃
花渚適宿春風塲紅草涵電色綠樹鑠烟光高歌倏闕
國微嘆依笙簧請學碧靈草終歲自芬芳

劉僕射東山集

蕭蕭雲色滋惟愛起長恩喬木嘯山曲征鳥怨水湄共
惜玉樽暮願是一作使光陰遲紳裳視絕雲銜意方此時
誦飾江皋駕終從海濱詩

陸東海譙山集

杳杳長役思思來使情濃恒忌光氛度藉蕙望春紅青
莎被海月朱華冒水松輕氣一作風暖長嶽雄虹赫遠峰
日暮崦嵫谷參差綵雲重永願白沙渚遊衍遂相從丹
山有琴瑟不為憂傷容

無錫縣歷山集

愁生白露日思起秋風年竊悲杜蘅暮墜涕弔空山落
葉下楚水別鶴噪吳田嵐一作瘴氣陰不極日色半虧天
酒至情蕭瑟憑樽還惘然一聞清琴奏歔泣方留連况

乃客子念直置

一作視

絲竹間

外兵舅夜集

丹林一葉舊碧草從此空烟光拂夜色華舟盪秋風斂
意悵何已極望情思中瑤瀾寂以晏若采能幾終暮心
亦誰寄江臯桂有叢

貽袁常侍

昔我別楚水秋月麗秋天今君客吳坂春色縹

一作日媚

春

泉幽冀生碧草沅湘含翠烟鏤鏤霞上景懜懜雲外山

涉江竟何望留滯空採蓮駐情光氣下凝怨琴瑟前珠
貝性明潤蘭玉好芳堅不以宿昔岨懷愧期暮年

古意報袁功曹

從軍出隴北長望陰山雲涇渭各流異恩情於此分故
人贈寶劍鏤以瑤華文一言鳳獨立再說鸞無羣何得
晨風起悠哉凌翠氛黃鵠去千里垂涕為報君

寄丘三公

昔我學冠劍逢君在三川何意風雨激一訣異東西菊

秀空應奪蘭芳幾時堅常恐握手畢黯如光絕天安得
明月珠擘涕寄吳山

卧疾怨別劉長史

四時煎日夜玉露催紫禁始懷未及歎春意秋方驚涼
草散螢色衰樹斂蟬聲憑景魂且謚卧堂怨已生承君
客江潭先愁鴻雁鳴吳山饒離袂楚水多別情金堅碧
不滅桂華蘭有英無輟代上朝豈惜鏡中明但見一葉
落哀恨方未平

燈夜和殷長史

冬盡綵葉暮金石亦懷傷
冰鱗不能起水鳥望川梁
客子仿永叔寂寞幽意長
卧歇丹丘采坐失曾泉光
結眉慘成慮銷憂非羽觴
此心異可緩清芷在沅湘

贈鍊丹法和殷長史

琴高遊會稽靈變竟不還
不還有長意長意希童顏
身識本爛漫光曜不可攀
方驗參同契金竈鍊神丹
頓捨心知愛永却平生歡
玉牒裁可卷珠藥不盈簞
譬如明

月色流采映歲寒一待黃冶就青芬遲孤鸞

從蕭驃騎新帝壘

鯢妖毀王度虹氣岨王猷上宰軫靈略宏威肅廣謀據
嶮冒戈堞乘嶠架烽樓燕兵歌越水代馬思吳州金笳
夜一遠明月信悠悠雲色被江出烟光帶海浮開襟夾
蒼宇拓遠局溟洲折日承丹谷總駕臨青丘仄待颺霧
晏方從畎壑遊

惜晚春應劉祕書

烟景抱空意蘅杜綴幽心心憂望碧葉涵影顧青林風
光多樹色露華翻蕙陰水苔方下蔓石蘿日上尋霞衣
已具帶仙冠不待簪徒為多委鬱精魄還自臨始獲瓊
歌贈一點重如金山中有雜桂玉瀝乃共斟

秋夕納涼奉和刑獄舅

蕭條晚秋景旻雲承景斜虛堂起青靄崦嵫生暮霞空
居寂以欵左右自幽歌騎星謝箕尾濯髮慙陽阿年歇
玄圃壁歲減天津波金簫哀夜長瑞琴怨暮多四時通

信黯春風日夜過楚水徒有蘭憂至竟如何

郊外望秋答殷博士

白露掩江臯青蒲平地蕪長夜亦何際銜思久踟躕企
余重蘭貝清才富金瑜獨豔始東山擅麗終西都雲精
無永滯水碧豈暫濡屬我岷景半賞爾若光初折麻異
離羣紉蕙非索居頻贈既雅歌還懷諒短

一作
知書

冬盡難離和丘長史

閒居深悵悵寒拂中閨寶禮自千里縑書果君題山

川吐幽氣雲景抱長懷茲別亦為遠潮瀾鬱東西汀臯
日慘色桂閣猿方啼擘意誰侘祭屑涕在心乖杜蘅念
無沫石蘭終不睽異惣歲暮駕遊衍蒼山蹊

池上酬劉記室

戚戚憂可結結憂視春暮紫荷漸曲池臯蘭覆徑路葱
蒨亘華堂益益雜綺樹為此久佇立容易光陰度水館

次文羽

文羽一作久雨

山葉下暝露懷賞入舊襟悅物覽新賦

惜我無雕文報章慚復素

吳中禮石佛

幻生太浮詭長思多沈疑疑思不慙炤詭生寧盡時敬
承積劫下金光鑠海湄火宅斂焚炭藥草匪惠滋常願
樂此道誦經空山坻禪心暮不雜寂行好無私軒騎久
已訣親愛不留遲憂傷漫漫情靈意終不溜誓尋青蓮
果永入梵庭期

採石上菖蒲

瑤琴久蕪沒

一作瓊琴
久塵蕪

金鏡廢不看不見空閨裏縱橫

愁思端緩步遵汀渚揚柁泛春瀾電至烟流綺水綠桂
涵丹憑酒竟一作意未悅半景方自歎每為憂見及杜若
詎能寬異採石上草得以駐餘顏赤鯉儻可乘雲霧不
復還

雜體三十首 有序

夫楚謠漢風既非一骨魏製晉造固亦二體譬猶藍朱
成采雜錯之變無窮宮商為音靡曼之態不極故蛾眉
詎同貌而俱動於魄芳草寧共氣而皆悅於魂不其然

歟至於世之諸賢各滯所迷莫不論甘而忌辛好丹而

非素豈所謂通方廣恕好遠兼愛者哉乃及

選無乃字及一作致

公幹仲宣之論家有曲直安仁士衡之評人立矯抗况

復殊於此者乎又貴遠賤近人之常情重耳輕目俗之

恒蔽是以邯鄲托曲於李竒士季假論於嗣宗此其效

也然五言之興諒非復古但關西鄴下既已罕同河外

江南頗為異法故玄黃經緯之辨金碧浮沈之殊僕以

為亦各具美兼善

選作合其美並善

而已今作三十首詩數其

文體雖不足品藻淵流庶亦無乖商確云爾

古離別

一作別離

遠與君別者乃至鴈門關黃雲蔽千里遊子何時還送
君如昨日簷前露已團不惜蕙草晚所悲道里寒君在
天一涯一作君行在天涯妾身長別離願一見顏色不異瓊樹
枝兔絲及水萍所寄終不移

李都尉從軍

陵少卿

樽酒送征人踟躕在親宴日暮浮雲滋握手淚如霰悠

悠清川水嘉魴得所薦而我在萬里結髮一作友不相見
袖中有短書願寄雙飛燕

班婕妤詠扇

紈扇如團

選作

月出自機中素畫作秦王女乘鸞向煙

霧彩色世所重雖新不代

一作似

故竊愁涼風至吹我玉

階樹君子恩未畢零落在中路

魏文帝遊宴

丕子桓

置酒坐飛閣逍遙臨華池神飈自遠至左右芙蓉披綠

竹夾清水秋蘭被幽崖月出照園中冠珮相追隨客從
南楚來為我吹參差淵魚猶伏浦聽者未云疲高文一
何綺小儒安足為肅肅廣殿陰雀聲愁北林衆賓還城
邑何以慰吾心

陳思王贈友

植子建

君王禮英賢不恡千金璧雙闕指馳道朱宮羅第宅從
容氷井臺清池映華薄涼風盪芳氣碧樹先秋落朝與
佳人期日夕望青閣褰裳摘明珠徙倚拾蕙若眷我二

三子辭義麗金縷延陵輕寶劍季布重然諾處富不忘
貧有道在葵藿

劉文學感遇 楨公幹

蒼蒼山中桂團團霜露色霜露一何繁桂枝生自直橘
柚在南國因君為羽翼謬蒙聖主私託身文墨職丹采
既已過敢不自雕飾華月照芳池列坐金殿側微臣固
受賜鴻恩良未測

王侍中懷德 粲仲宣

伊昔值世亂秣馬辭帝京既傷蔓草別方知杖杜情
嶠函復丘墟冀闕緬縱倚棹汎涇渭日暮山河清蟋蟀
依桑野嚴風吹若莖鸛鷓在幽草客子淚已零去鄉三
十載幸遭天下平賢主降嘉賞金貂服玄纓侍宴出河
曲飛蓋遊鄴城朝露竟幾何忽如水上萍君子篤惠義
柯葉終不傾福履既所綏千載垂今名

嵇中散言志

康叔夜

曰余不師訓潛志去世塵遠想出宏域高步超常倫靈

鳳振羽儀戢景西海濱朝食琅玕實夕飲玉池津處順
故無累養德乃入神曠哉宇宙惠雲羅更四陳哲人貴
識義大雅明庇身莊生悟無為老氏守其真天下皆得
一名實久相賓咸池饗爰居鐘鼓或愁辛柳惠善直道

孫登庶知人寫懷良未遠感贈以一作還書紳

阮步兵詠懷籍嗣宗

青鳥海上遊鶯斯蒿下飛沈浮不相宜羽翼各有歸飄
颺可終年沉一作混瀆安是非朝雲乘變化光耀世所希

精衛銜木石誰能測幽微

張司空離情 華茂先

秋月映

一作照

簾櫳懸光入丹墀佳人撫鳴琴清夜守空

帷蘭徑少行迹玉臺生網絲庭樹發紅彩閨草含碧滋
延佇整綾綺萬里贈所思願垂湛露惠信我皎日期

潘黃門述哀 岳安仁

青春速天機素秋馳白日美人歸重泉悽愴無終畢殯
宮已肅清松柏轉蕭瑟俯仰未能弭尋念非但一撫衿

悼寂寞恍然若有失明月入綺窗髣髴想蕙質銷憂非
萱草永懷寄夢寐夢寐復冥冥何由覿爾形我慙北海
銜爾無帝女靈駕言出遠山徘徊泣松銘雨絕無還雲
花落豈留英日月方代序寢興何時平

陸平原羈宦

機士衡

儲后一作諸后降嘉命恩紀被微身明發眷桑梓永歎懷密

親流念辭南澁銜怨別西津驅馬遵淮泗旦夕見梁陳
服義追上列矯迹厠宮臣朱黻咸髦士長纓皆俊民契

濶承華內綢繆踰歲年日暮聊總駕逍遙觀洛川殂選作

租殂選作沒一作役多拱木宿草凌選作陵寒煙遊子易感慨選作

慄躑躅還自憐願言寄三鳥離思非徒然

左記室詠史 思太沖

韓公淪賣藥梅生隱市門百年信在苒何用一作為苦心

魂當學衛霍將建功在河源珪組賢君眄青紫明主恩

終軍才始達賈誼位方尊金張服貂冕許史乘華軒王

侯貴片議公卿重一言太平多懽娛飛蓋東都門顧念

張仲蔚蓬蒿滿中園

張黃門苦雨

協景陽

丹霞蔽陽景綠泉涌陰渚水鶴巢層甍山雲潤柱礎有
奔興春節愁霖貫秋序變變涼葉奪戾戾颼風舉高談
翫四時索居慕儔侶青苔一作苔日夜黃芳蕤成宿楚歲
暮百慮交無以慰延佇

劉太尉傷亂

琨越石

皇晉遘陽九天下橫氛霧秦趙值薄蝕幽并逢虎據伊

余荷寵靈感激徇馳騫雖無六奇術莫與張韓遇寔戚
扣角歌桓公遭乃舉荀息冒險難實以忠貞故空今日
月逝愧無古人度飲馬出城濠北望沙漠路千里何蕭
條白日隱寒樹投袂既憤懣一作滿撫枕懷百慮功名惜
未立玄髮已改素時哉苟有會治亂就選作冥數惟

盧侍郎感交 諶子諒

大厦須異材廊廟非庸器英俊著世功多士濟斯位眷
顧成綢繆乃與時髦匹姻媾久不虧選作契濶豈但一

逢厄既已同處危非所恤常慕先達槩觀古論得失馬
服為趙將疆場得清謚信陵佩魏印秦兵不敢出慨無
幄中策徒慙素絲質羈旅去舊京感遇踰選作琴瑟自
顧非杞梓勉力在無逸更以畏友朋濫吹乖名實

郭弘農遊仙 璞景純

崦山多靈草海濱饒竒石偃蹇尋青雲隱淪駐精魄道
人讀丹經方士鍊玉液朱霞入窗牖曜靈照空隙傲睨
摘木芝陵波采水碧眇然萬里遊矯掌望烟客永得安

期術豈愁濛汜迫

孫

選作張

廷尉雜述

綽子荆

太素既已分吹萬著形兆寂動苟有源因謂殤子天道
喪涉千載津梁誰能了思乘扶搖翰卓然凌風矯靜觀
尺椽義理足未嘗少同同秋月明憑軒詠堯老浪迹無
蚩妍然後君子道領畧歸一致南山有綺皓交臂久變
化傳火乃薪草疊疊玄思清胃中去機巧物我俱忘情
可以狎鷗鳥

許徵君自叙 詢元度

張子閤內幾單生蔽外像一時排冥筮冷然空中賞遣
此弱喪情資神任獨往採藥白雲隈聊以肆所養丹葩

曜芳蕤綠竹

一作草

陰閒敞茗茗寄意勝

一作勝景

不覺凌虛

上曲櫺激鮮飈石室有幽響去矣從所欲得失非外獎
至哉操斤客重明固已朗五難既灑落超迹絕塵網

殷東陽興矚

仲文

晨遊任所萃悠悠蘊真趣雲天亦遼亮時與賞心遇青

松挺秀萼惠色留喬

一作芳

樹極眺清波深緬映石壁素

瑩情無餘滓拂衣釋塵務求仁既自我玄風豈外慕直
置忘所宰蕭散得遺慮

謝僕射遊覽

琨叔原

信矣勞物化憂襟未能整薄言遵郊衢總轡出臺省淒
淒節序高寥寥心悟永時菊耀巖阿雲霞冠秋嶺眷然
惜良辰徘徊踐落景卷舒雖萬緒動復歸有靜曾是迫
桑榆歲暮從所秉舟壑不可攀忘懷寄匠郢

陶徵君田居 潛淵明

種豆在東臯，苗生滿阡陌。雖有荷鋤倦，濁酒聊自適。日暮巾柴車，路闇光已夕。歸人望烟火，稚子候檐隙。問君亦何為，百年會有役。但願桑麻成，蠶月得紡績。素心正如此，開逕望三益。

謝臨川遊山 靈運

江海經遭迴，山嶠備盈缺。靈境信淹留，賞心非徒設。平明登雲峯，杳與廬霍絕。碧障長周流，金潭恒澄澈。桐一作

洞林帶晨霞石壁映初晰乳竇既滴瀝丹井復寥泝
聳轉竒秀岑崱還相蔽赤玉隱瑤溪雲錦披沙汭夜聞
猩猩啼朝見鼯鼠逝南中氣候暖朱華凌白雪幸遊建
德鄉觀竒經一作探禹穴身名竟誰辨圖史終磨滅且泛
桂水潮映月遊海溼攝生貴處順將為智者說

顏特進侍宴

延之

太微凝帝宇瑤光正神縣揆日粲書史相都麗聞見列
漢構仙宮開天製寶殿桂棟留夏廳蘭橈停冬霰青林

結冥濛丹巘被

一作披

葱蒨山雲備卿霑池卉具靈變重

陽集清氛下輦降玄宴驚望分寰隧曬曠盡都甸氣生

川嶽陰煙滅淮海見中坐溢朱組步櫛篋瓊弁禮登佇

睿情樂闋延皇眇測恩躋愉逸泐牒懵浮賤承榮重兼

金

選作榮重
餽兼金

巡華過盈瑱敢飾輿人詠方慙淥水薦

謝法曹贈別 惠連

昨發赤亭渚今宿浦陽汭方作雲峯異豈伊千里別芳

塵未歇席岑

一作零

淚猶在袂停艫望極浦弭棹阻風雪

風雪既經時夜永起

一作
豈

懷思汎濫北湖遊茗

一作
岩

亭

南樓期點翰詠新賞開
裛瑩所疑摘芳愛氣馥
拾藥憐色滋色滋畏沃
若人事亦銷鑠子衿怨
勿往谷風諂輕

薄共秉延州信無慙仲路

一作
由

諾靈芝望三秀孤筠

一作

雲情所託所託已殷勤
祇足攪懷人今行嶮
嶮外銜思

至海濱覲子杳未偁

一作未
偁聚

欸睇在何辰雜珮雖可贈

疏華竟無陳無陳心
惝勞旅人豈遊遨
幸及風雪霽青春
滿江臯解纜候前
侶還望方鬱陶
煙景若離遠末響

寄瓊瑤

王徵君養疾

徵

窈窕瀟湘空翠澗
澹無滋寂歷百草晦
歛吸鷓鴣悲清陰
往來遠月華散前墀
鍊藥矚虛幌
汎瑟卧遙帷
水碧驗未贖金膏
靈詎緇北渚
有帝子蕩瀆不可期
悵然山中暮懷痾屬此詩

袁太尉從駕

淑

宮廟禮哀敬
粉邑道嚴玄
恭潔由明祀
肅駕在祈年
詔

徒登季月戒鳳藻行川雲旆象漢徒宸網擬星懸朱權
麗寒渚金鋌映秋山羽衛藹流景綵吹震沈淵辨詩測
京國履籍鑿都鄜選作萌
一作岷謠響玉律邑頌被丹絃文
軫薄桂海聲教燭冰天和惠頌上笏恩渥浹下筵幸侍
觀洛後豈慕巡河前服義方無沫展歌殊未宣

謝光祿郊遊莊希逸

肅舸出郊際徒樂逗江陰翠山方藹藹青浦正沈沈涼
葉照沙嶼秋榮冒水潯風散松架險雲鬱石道深靜默

鏡絲野四睇亂層岑氣清知鴈引露華識猿音雲裝信
解散煙駕可辭金始整丹泉術終覲紫芳心行光自容
裔無使弱思侵

鮑參軍戎行

昭明遠

豪士枉尺璧宵人重恩光徇義非為利執羈輕去鄉孟
冬郊祀月殺氣起嚴霜戎馬粟不暖軍士冰為漿晨上
城臯坂磧礫皆羊腸寒陰籠白日太谷晦蒼蒼息徒稅
征駕倚劔臨八荒鷓鴣不能飛玄武伏川梁鍛翮由時

至感物聊自傷
豎儒守一經
未足識行藏

休上人怨別 惠休湯氏

西北秋風至
楚客心悠哉
日暮碧雲合
佳人殊未來
露彩方泛艷
月華始徘徊
寶書為君掩
瑤琴詎能開
相思巫山渚
悵望陽雲臺
膏鑪絕沈燎
綺席生浮埃
桂水日千里
因之平生懷

學魏文帝

西北有浮雲
繚繞華陰山
惜哉時不遇
入夜值霜寒
秋

風聒地起吹我至幽燕幽燕非我國窈窕為誰賢少年
歌且止歌聲斷客子

效阮公詩十五首

歲暮懷感傷中夕弄清琴戾戾曙風急團團明月陰孤
雲出北山宿鳥驚東林誰謂人道廣憂慨自相尋寧知
霜雪後獨見松竹心

十年學讀書顏華尚美好不逐世間人鬪雞東郊道富
貴如浮雲金玉不為寶一旦鷓鴣鳴嚴霜被勁草志氣

多感失淚

泣一作

下沾懷抱

白露淹庭樹秋風吹羅衣忠信主不合辭意將訴誰獨

坐東

高一作

軒下雞鳴夜已晞總駕命賓僕遵路起旋歸

天命誰能見人蹤信可疑

飄飄恍惚中是非安所之大道常不驗金火每如斯恍
慨少淑貌便娟多令辭宿昔秉心誓靈明將見期願從
丹丘駕長弄華池滋

陰陽不可知鬼神惟杳冥暫試武帝貌一見李后靈同

情淪異物有體入無形賢聖共草昧仁智焉足明變化
未有極恍惚誰能精

若木出海外本自丹水陰群帝共上下鸞鳥相追尋千
齡猶旦夕萬世更浮沈豈與異鄉士瑕瑜論淺深

夏后乘兩龍高會在帝臺榮光河雒出白雲蒼梧來侍
御多賢聖升降有羣才四時有變化盛明不徘徊高陽
邈已遠竚立誰語哉

昔余登大梁西南望洪河時寒原野曠風急霜露多仲

冬正慘切日月少精華落葉縱橫起飛鳥時相過搔首
廣川陰懷歸思如何常願反初服閒步潁水阿

宵月輝西極女圭映東海佳麗多異色芬葩有竒采綺
縞非無情光陰命誰待不與風雨變長共山川在人道
則不然消散隨風改

少年學擊劍從師至幽州燕趙兵馬地唯見古時丘登
城望山水平原獨悠悠寒暑有往來功名安可留

擾擾當途子毀譽多埃塵朝生輿馬間夕死衢路濱藜

藿應見棄勢位乃為親華屋爭結綬朱門競彈巾徒羨
草木利不愛金碧身至德所以貴河上有丈人

華樹曜北林芬芳空自宣秋至白雲起蟋蟀號庭前中
心有所思虛堂獨浩然安坐詠琴瑟逍遙可永年

假乘試行遊北望高山岑翩翩征鳥翼蕭蕭松柏陰感
時多辛酸覽物更傷心性命有定理禍福不可禁唯見
雲際鵠江海自追尋

夕雲映西山蟋蟀吟桑梓零露被百草秋風吹桃李君

子懷苦心感慨不能止
駕言遠行遊驅馬清河
渙寒暑更進退金石有
終始光色俯仰間英艷
難久恃

至人貴無為裁魂守寂
寥唯有馳騫士風塵在
一朝輿馬相跨躍賓從
共矜驕天道好盈缺春
華故秋凋不知北山民
商歌弄場苗

就謝主簿宿

季月寒氣重滋蘭錯無芳
北風

一作方

漂夜色河凝暘如

霜悵哉心神晚燭滅此深
堂艾

一作菱

衣如可贈寧濕岨

雲梁

無錫舅相送銜涕別

心遠路已迴意滿辭未陳
曾風漂別蓋北雲竦征人杯
酒憐歲暮志氣非上春
若無孤鳥還瀝泣何所因

當春四韻同王左丞

雷萌山中草雲煦江上花
流烟漾璇景輕風泛凌霞
我有幽蘭念銜意矚里斜
友人殊未還獨慰簷前華

感春水遙和謝中書二首

江皋桐始華
斂衣望邊亭
平原何寂寂
島暮蘭紫莖
芬披好草合
流爛新光生
冰雪徒皦潔
此焉空守貞

暮意歌上春

一作卷

悵哉望佳人
擘洲之宿莽
命為瑤桂

因觀書術不變學
古道恒真若作商
山客寄謝丹水濱
詠美人春遊

江南二月春
東風轉綠蘋
不知誰家子
看花桃李津
白雪凝瓊貌
明珠點絳唇
行人咸息駕
爭擬洛川神

征怨

蕩子從征久鳳樓
簫管閒獨枕彫雲
鬢孤燈損玉顏何
日邊塵淨庭前征
馬還

清思詩五首

趙后未至麗陰妃
非美極情理儻可
論形有焉足識帝
女在河洲晦映西
海側陰陽無定光
雜錯千萬色終歲
如瓊草紅華長翕
艷

師曠操雅操延子
聆竒音玄鶴徒翔
舞清角自浮沈明
瑄東南逝精絲一作思
西北臨白雲瑶池
曲止一作上使淚

淫淫

秋夜紫蘭生湛湛
明月光偃蹇靈芝采
容裔紫華堂
林木不拂蓋
淇水寧漸裳
倏忽南江陰
照曜北海陽
從此長往來
萬世無感傷

白露滋金瑟
清風蕩玉琴
空閨饒遠念
虛堂生夜陰
茲

夕一何哀

一作衰

明月沒西林
世人重時暮
道士情亦深

願

一作賴

乘青鳥翼
徑出玉山岑

至德不可傳
靈龜不可侶
草木還根蒂
精靈歸妙理
我

學杳冥道誰能測窮已須待九轉成終會長沙市

傷內弟劉常侍

金壁自蕙質蘭杜

一作桂

信嘉名丹綵既騰迹華萼故揚

聲伊余方罷秀歎息向君榮誰疑春光旻何遽秋露輕
遠心惜近路促景怨長情風至衣袖冷况復蟋蟀鳴白
露沿漢沼明月空漢生長悲離短意惻切吟空庭注歎
東郊外流涕北山垆

悼室人十首

佳人永暮矣，隱憂遂歷茲。寶燭夜無華，金鏡晝恒微。桐葉生綠水，霧天流碧滋。蕙弱芳未空，蘭深鳥思時。湘醪徒有酌，意塞不能持。

適見葉蕭條，已復花蒼鬱。帳裏春風盪，簷前暎燕拂。垂涕視去景，摧心向徂物。今悲輒流涕，昔懼常飄忽。幽情一不弭，守歎誰能慰。

夏雲多雜色，紅光鑠蕤鮮。萋弱屏風草，潭拖曲池蓮。黛葉鑑深水，丹華香碧烟。臨綵方自弔，擘氣以傷然。命知

悲不絕恒如注海泉

駕言出遊衍冀以滌心胸復值烟雨散清陰帶山濃素
沙匝廣岸雄虹冠尖峯出風舞森桂落日暖圓松還結
生不念楚客獨無容

秋至擣羅紈淚滿未能開風光肅入戶月華為誰來結
眉向珠網瀝思視青苔髻局將成葆帶減不須摧我心
若含烟蓋蓋滿中懷

窻塵歲時阻闋蕪日夜深流黃久不織寧聞梭杼音涼


靄漂虛座清香盪空琴蜻引知寂寥蛾飛測幽陰乃抱
生死悼豈伊離別心

顛顛氣薄暮菽菽清衾單階前水光裂樹上雪花團庭
鶴哀以立雲雞肅且寒方冬有苦淚承夜非膏蘭從此
永黯削萱葉焉能寬

抒悲情雖滯送往意所知空座幾時設虛帷無久垂暮
氣亦何勁嚴風照天涯夢寐無端際愴恍有分離意念
每失乖徒見四時虧

神女色姱麗乃出巫山湄透迤羅袂下鄣日望所思佳
人獨不然戶牖絕錦綦感此增嬋娟屑屑涕自滋清光
澹且減低意守空帷

二妃麗瀟湘一有乍一無佳人承雲氣無下此幽都當
追帝女迹出入泛靈輿掩映金淵側遊豫碧山隅曖然
時將罷臨風返故居



江文通集卷四